



Eich cyf/Your ref P-06-1522
Ein cyf/Our ref MA/JB/00672/25

Carolyn Thomas AS
Cadeirydd y Pwyllgor Deisebau

20 Awst 2025

Annwyl Carolyn,

Diolch ichi am eich llythyr dyddiedig 24 Mehefin ynglŷn â Deiseb P-06-1522 – "Cynnull uwchgynhadledd i gyflymu buddsoddi cynaliadwy a moesegol gan bensiynau'r sector cyhoeddus". Mae pensiynau galwedigaethol, gan gynnwys y Cynllun Pensiwn Llywodraeth Leol, yn parhau i fod yn fater a gedwir yn ôl, a Llywodraeth y DU sy'n gyfrifol am wneud penderfyniadau ar y cynllun hwnnw. Nid oes gennyf unrhyw bwerau mewn perthynas â'r cynllun, na sut mae'n cael ei weithredu.

Fel y mae'r ddeiseb yn nodi, lansiodd Llywodraeth y DU adolygiad o bensiynau y llynedd, gyda'r nod o hybu buddsoddiad, gan gynnwys buddsoddi mewn economïau lleol ac yn y DU; cynyddu maint cronfeydd buddsoddi; a mynd i'r afael â gwastraff a dyblygu yn y system bensiynau. Mae'r rhain, wrth gwrs, yn amcanion y mae Llywodraeth Cymru yn eu cefnogi'n llawn. Mae Llywodraeth Cymru wedi mynegi ei chefnogaeth gref tuag at greu Partneriaeth Pensiynau Cymru (neu gronfa Cymru) a oedd yn rhagflaenu'r trefniadau cyfuno ehangach yn y Cynllun Pensiwn Llywodraeth Leol.

Yn dilyn yr ymgynghoriad hwn, cyflwynodd Llywodraeth y DU ei Bil Cynlluniau Pensiwn ym mis Mehefin eleni. Os caiff ei basio, bydd yn cryfhau gallu cronfeydd pensiynau Llywodraeth Leol i fuddsoddi mewn seilwaith ac er budd economaidd lleol a rhanbarthol. Bydd yn ei gwneud yn ofynnol i'r awdurdodau sy'n gweinyddu'r pensiynau weithio gyda chydbwyllgorau corfforedig i nodi cyfleoedd buddsoddi posibl sy'n addas ar gyfer buddsoddi pensiynau.

Mae'r ddeiseb yn cyfeirio'n gywir at ddeddfwriaeth nodedig Llywodraeth Cymru, Deddf Llesiant Cenedlaethau'r Dyfodol 2015, a ddylai lywio penderfyniadau cyrff cyhoeddus. Mae ein Rhaglen Lywodraethu yn pwysleisio'r angen i greu Cymru gryfach, decach, a gwyrddach gyda ffocws ar fynd i'r afael â'r newid yn yr hinsawdd a chyflawni Sero Net erbyn 2050. Mae'n amlwg bod rôl bwysig yma i fuddsoddwyr pensiwn a buddsoddwyr eraill i fuddsoddi mewn camau gweithredu cadarnhaol mewn perthynas â'r hinsawdd ac i gefnogi economi Cymru. Rwy'n gobeithio y bydd Partneriaeth Pensiynau Cymru yn parhau i ddatblygu ei gweithgareddau yn unol â'r blaenoriaethau hyn.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Jayne.Bryant@llyw.cymru
Correspondence.Jayne.Bryant@gov.Wales

Rydym yn croesawu derbyn gohebiaeth yn Gymraeg. Byddwn yn ateb i ohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Rwyf innau a'm rhagflaenwyr wedi trafod hyn gydag Arweinwyr ac Aelodau'r Awdurdod Pensiwn. Roedd hyn yn cynnwys trafodaeth yn y Cyngor Partneriaeth Llywodraeth Leol gydag Arweinwyr etholedig, pan gyflwynodd Cadeirydd Partneriaeth Pensiynau Cymru y camau yr oedd y gronfa yn eu cymryd i gynyddu cyfleoedd i fuddsoddi mewn modd sy'n cael effaith gadarnhaol ar yr hinsawdd, ac i ystyried y risgiau a achosir gan fuddsoddiadau mewn cronfeydd sy'n gysylltiedig â thanwydd ffosil.

Yn sgil hynny, hwylusodd CLILC, ar y cyd â Chyfeillion y Ddaear, ddigwyddiad i adeiladu ymhellach ar y sgysiau a gynhelir ledled Cymru ar ddatgarboneiddio cronfeydd pensiwn. Roedd aelodau etholedig a swyddogion yn bresennol yn y digwyddiad hwnnw. Cafodd ei gadeirio gan Gadeirydd Pwyllgor Llywodraethu Partneriaeth Pensiynau Cymru ar y pryd, ac roedd yn cynnwys siaradwyr gwadd o gwmni'r Good Economi, Ysgol Fusnes Prifysgol Leeds, a Chronfa Bensiwn Abertawe. Cyn y trafodaethau llawn ar yr heriau i ddatgarboneiddio pensiynau a sut i'w goresgyn, cafwyd cyfle i wrando ar y siaradwyr arbenigol hyn yn rhannu eu profiadau wrth symud tuag at bensiwn cynaliadwy.

Er i'r trafodaethau gydnabod bod yn rhaid i'r cronfeydd sicrhau eu bod yn gallu bodloni gofynion pensiwn eu haelodau, roedd cytundeb cyffredinol ar y potensial i gronfeydd hefyd gefnogi'r gweithgarwch i ehangu sectorau sy'n cynhyrchu enillion ar yr un pryd â chyfrannu'n gadarnhaol tuag at nodau sero net. Cafodd tai fforddiadwy, cyllid busnesau bach a chanolig a dargedir, ynni glân, a chyfalaf natur i gyd eu nodi fel enghreifftiau sydd â photensial o'r fath.

Rwy'n gobeithio bod yr wybodaeth hon o gymorth ichi.

Yn gywir,



Jayne Bryant AS/MS

Ysgrifennydd y Cabinet dros Lywodraeth Leol a Thai
Cabinet Secretary for Housing and Local Government